

## Iwwer die Spatze.

Wenn de Karl, de Schorsch unn ich sunndaachs om Stommdisch zesommehocke, doo werd vill geschwetzt, unn meistens kumme mer doo vom Hinkelche uffs Gickelche.

Beim letzte Mol sinn mer aach uffs Geflüchel kumme, awwer uff die Spatze. Weil de Karl gesaacht hott, er det koo Spatze meer in soim Gatte heern, dess Schilpe von dene Spatze wär gonz verschwunne, unn desweche hätte die Naturschitzer aach de Spatz zum Voochel vom Johr 2002 gemacht, unn ob mir nit aach moone dete, dass dess mett em Klima sesomme hängt, mir dete es joo jetzt grad merke, weil dess doch nit normal iss, wens um die Zeit so um die zwonzich Grad warm iss?

Ei, habb ich zur Ondwort gewwe, dess iss mir aach schunn uffgefallene, weil in moim Gatte sinn jetzt mehr Dauwe wie Spatze. Frierer hawwe mer gesaacht, wenn ebbes gonz rar war, dess iss e Ringeldäubsche, unn heit sinn grad die Ringeldauwe die Veechel, die mer om meiste sehe unn aach heern dut, mett ihm Gerucks de ganze Daach, unn dass die jetzt schunn oofonge ze balze, de Januar iss doch grad erst erumm, dess hotts joo aach noch nit gewwe.

Unn dann hott de Karl de Schorsch gestummt: Schorsch, du sechst joo garnix, was machsden ferr Gesicht?

Doo hott de Schorsch gesaacht: Wenn ich droo denk, dass mir als Buwe mett de Schlauder uff die Spatze geschosse hawwe, die iwwerall uff de Gass erumgehippt sinn, monchmol sogar ooner getroffe hawwe, dann dut mer dess jetzt noch laad, weil mett so oom Schuss hosde nit nor de Spatzevadder, aach soi Kinner unn Enkel hosde doodemett vom Lewe verschont, unn doo droo leit dess, dass es heit nit mehr so vill von dene Spatze gibt. Dess Klima konns nit soi, weil dess hotts joo schunn immer gewwe.

Doo hott de Karl mett soim Kopp gewackelt, unn wennerr dess mecht, dann kimmt doo immer ebbes eraus: Schorsch, mach derr mol koo Gedonke, ich glaab, dess is, weil su vill von dene Spatze gefonge wern. Gefonge, hott doo de Schorch gesaacht, ess wern doch koo Spatze gefonge. Doch, moont doo de Karl, dess heerst de doch jeden Daach in de Börsenachrichte: De Spatz in de Hond iss besser als die Daub uffem Dach!

Eiern Honnes